

Na osnovu člana 9. Zakona o Gradu Visoko («Službene novine FBiH», broj: 30/19) i člana 22. Statuta Općine Visoko („Službeni glasnik Općine Visoko“, broj: 01/11, 08/13 i 11/18) Općinsko vijeće Visoko, na 30. sjednici održanoj 31.05.2019. godine, donijelo je

## **PRIVREMENU STATUTARNU ODLUKU GRADA VISOKO**

### **I. OPĆE ODREDBE**

#### **Član 1.**

(predmet Odluke)

Ovom Statutarnom odlukom u skladu sa Zakonom o Gradu Visoko («Službene novine FBiH», broj: 30/19), uređuje se uspostava organizacija i funkcionisanje Grada Visoko u periodu do donošenja Statuta Grada, te druga pitanja.

#### **Član 2.**

(pravni status)

(1) Grad Visoko je jedinica lokalne samouprave sa pravima i obavezama utvrđenim Ustavom i Zakonom.

(2) Grad Visoko je pravno lice.

### **II STATUSNA OBILJEŽJA GRADA**

#### **Član 3.**

(Naziv i sjedište Grada)

(1) Naziv Grada je: Grad Visoko (u daljem tekstu: Grad).

(2) Sjedište Grada je: Visoko, Ulica Alije Izetbegovića broj 12A.

#### **Član 4.**

(teritorija Grada)

Teritoriju Grada Visoko čine sva naseljena mjesta, koja se prema evidenciji Federalnog zavoda za statistiku nalaze u okviru područja Općine Visoko na dan stupanja na snagu Zakona o Gradu Visoko.

#### **Član 5.**

(Grb i zastava Grada)

(1) Grad ima grb i zastavu.

(2) Grb je štitastog oblika zelene boje na koje je ucrtana kruna zlatno-žute boje sa ljiljanima, stilizovana srednjevjekovna utvrda bijele boje, osmokraka zvijezda crvene boje i stilizovano slvo “V” plave boje, grb je optračen sa trakom zlatno žute boje.

(3) Zastava Grada Visoko je pravougaonog oblika bijele boje .

Na sredini dužine zastave nalazi se grb Grada.

Odnos širine i dužine zastave je 1: 2.

(4) Uslovi i način upotrebe grba i zastave Grada Visoko propisuju se posebnom odlukom Gradskog vijeća.

#### **Član 6.**

(pečat)

Gradsko vijeće, Gradonačelnik, Gradske službe, Mjesne zajednice Grada i Gradsko pravobranilaštvo Visoko imaju pečat.

Pečat je okruglog oblika i sadrži ispisan sljedeći tekst :  
Bosna i Hercegovina  
Federacija Bosne i Hercegovine  
Zeničko-dobojski kanton  
Grad Visoko, te naziv organa (Gradsko vijeće ili Gradonačelnik) odnosno službe, ispisan većim slovima.

Tekst je ispisan u koncentričnim krugovima.

U sredini pečata je grb Grada Visoko.

Uslovi i način upotrebe pečata Grada Visoko propisuje se posebnom odlukom Gradskog vijeća.

### **III ORGANI GRADA**

#### **Član 7.** (opća odredba)

Organi Grada su:

1. Gradsko vijeće
2. Gradonačelnik

#### **Član 8.**

(1) Ovlaštenja i obaveze koje proizilaze iz samoupravnog djelokruga Grada podijeljene su između Gradskog vijeća kao predstavničkog organa i Gradonačelnika kao izvršnog organa.

(2) Ako zakonom nije određeno koji je organ nadležan za obavljanje poslova iz samoupravnog djelokruga Grada, svi poslovi i zadaci koji se odnose na uređivanje odnosa iz samoupravnog djelokruga Grada (normativne naravi) u nadležnosti su Gradskog vijeća, a izvršni poslovi i zadaci u nadležnosti su Gradonačelnika.

(3) Ako se radi o izvršnim poslovima, a nije određena nadležnost za njihovo obavljanje, nadležna je služba za upravu, druga institucija ili tijelo uprave, koje ovlasti Gradonačelnik.

### **1. GRADSKO VIJEĆE**

#### **Član 9.** (mjesto i uloga)

(1) Gradsko vijeće je predstavnički organ građana i organ lokalne samouprave izabran na temelju općeg biračkog prava na neposrednim izborima tajnim glasanjem na način određen Izbornim zakonom.

(2) Gradsko vijeće donosi opće akte i druge akte u okviru samoupravnog djelokruga Grada te obavlja druge poslove u skladu sa Ustavom, zakonom i Statutom Grada.

Gradsko vijeće ima 25 općinskih vijećnika .

(3) Sastav Gradskog vijeća treba da odražava sastav stanovništva Grada prema posljednjem popisu, u skladu sa Izbornim zakonom BiH, kao i ravnopravnu zastupljenost oba spola.

Pripadnicima nacionalnih manjina obezbjeđuje se adekvatna zastupljenost u Gradskom vijeću, u skladu sa Izbornim zakonom BiH.

Gramatička terminologija korištenja muškog i ženskog roda podrazumjeva uključivanje oba roda.

#### **Član 10.** (nadležnost)

Gradsko vijeće u okviru svoje nadležnosti:

1. donosi Statut Grada dvotrećinskom većinom glasova;
2. donosi odluke i druge opće akte kojima uređuje pitanja iz samoupravnog djelokruga Grada;
3. donosi budžet Grada, godišnji izvještaj o izvršenju budžeta kao i odluku o privremenom finansiranju u skladu sa zakonom;
4. utvrđuje gradsku politiku u okviru nadležnosti i prati njeno ostvarivanje;
5. donosi razvojne, prostorne i urbanističke planove i programe, te provedbene planove, uključujući zoniranje;
6. donosi propise o porezima, taksama, naknadama i doprinosima Općine u skladu sa zakonom;
7. donosi odluke o upravljanju i raspolaganju imovinom Grada;
8. donosi odluke o zaduživanju Grada, o raspisivanju javnog zajma i davanju jamstva u skladu sa zakonom;
9. donosi programe uređenja gradskog građevinskog zemljiša;
10. donosi plan korištenja javnih površina;
11. donosi odluke o organizaciji mjesne samouprave i nazivima ulica, trgova i dijelova naseljenih mjesta;
12. donosi odluke o udruživanju Grada u saveze i druge oblike organizovanja, te o trajnom uspostavljanju prijateljske i druge saradnje s lokalnim i regionalnim zajednicama drugih država;
13. donosi odluke o proglašenju praznika Grada;
14. donosi odluke o priznanjima i nagradama Grada;
15. donosi odluke o raspisivanju referenduma i sazivanju zborova mjesnih zajednica ;
16. bira i razrješava predsjedavajućeg i zamjenika predsjedavajućeg Gradskog vijeća;
17. osniva radna tijela Gradskog vijeća te bira i razrješava njihove članove;
18. imenuje, bira i razrješava druge osobe određene zakonom, Statutom i odlukama, te daje saglasnost na imenovanja, izbor i razrješavanja kada je to propisano;
19. osniva preduzeća i ustanove i druga pravna lica za obavljanje komunalnih, društvenih, privrednih i drugih djelatnosti od interesa za Grad, te odlučuje o njihovim statusnim promjenama u skladu sa zakonom;
20. odlučuje o prestanku ustanova, preduzeća i drugih pravnih lica u skladu sa zakonom;
21. odlučuje o prijenosu i preuzimanju osnivačkih prava u skladu sa Statutom;
22. razmatra godišnji izvještaj o provođenju gradske politike i aktivnostima Gradonačelnika;
23. pokreće i razmatra inicijativu za pokretanje postupka opoziva Gradonačelnika i donosi odluke o pokretanju postupka opoziva Gradonačelnika;
24. ocjenjuje rad ustanova i kvalitet usluga u djelatnosti zdravstva, socijalne zaštite, obrazovanja, kulture i sporta, najmanje jednom godišnje, te osigurava finansijska sredstava za unapređenje njihovog rada i kvaliteta usluga u skladu sa potrebama stanovništva i mogućnostima Grada;
25. donosi pojedinačne i druge akte iz samoupravnog djelokruga Grada u skladu sa zakonom i Statutom;
26. analizira stanje javnog reda i mira, sigurnost ljudi i imovine najmanje jednom godišnje, te predlaže mjere prema nadležnim organima;
27. utvrđuje smjernice za vođenje kadrovske politike u skladu sa zakonom;
28. donosi Poslovnik o svome radu;
29. obavlja i druge poslove utvrđene zakonom i Statutom Grada.

## 2. GRADONAČELNIK

### Član 11. (mjesto i uloga)

(1) Gradonačelnik je nosilac izvršne vlasti Grada.

(2) Gradonačelnik se bira neposredno na način i po postupku utvrđenim Zakonom o izboru, prestanku mandata, opozivu i zamjeni načelnika općina u Federaciji Bosne i Hercegovine („Službene novine F/BiH“, br.19/08) .

## **Član 12.** (nadležnost)

Gradonačelnik kao nosilac izvršne vlasti u okviru samoupravnog djelokruga Grada:

1. predstavlja i zastupa Grad,
2. osigurava izvršavanje odluka i drugih akata Gradskog vijeća i odgovoran je za njihovo provođenje,
3. podnosi prijedlog budžeta Grada Gradskom vijeću,
4. odgovoran je za izvršavanje budžeta Grada,
5. obavlja upravljački nadzor nad zakonitošću rada javnih ustanova i preduzeća kojim je osnivač Grad, te im daje upute za rad,
6. donosi akte iz svoje nadležnosti,
7. predlaže odluke i druge akte Gradskom vijeću,
8. obezbjeđuje izradu i Gradskom vijeću podnosi na usvajanje razvojne planove, razvojne planove, investicione programe, prostorne i urbanističke planove i ostale planske i regulatorne dokumente koji se odnose na korištenje i upravljanje zemljištem, uključujući zoniranje i korištenje javnog zemljišta,
9. provodi politiku Grada u skladu sa odlukama Gradskog vijeća,
10. izvršava zakone i druge propise čije je izvršavanje povjereno Gradu,
11. utvrđuje organizaciju Službi za upravu i drugih službi Grada,
12. donosi Pravilnik o unutrašnjoj organizaciji Gradskih službi,
13. realizira saradnju Grada sa drugim općinama, gradovima, međunarodnim i drugim organizacijama u skladu sa odlukama i zaključcima Gradskog vijeća,
14. podnosi izvještaj Gradskom vijeću o ostvarivanju politike Grada i svojim aktivnostima,
15. odlučuje o pitanjima iz radnog odnosa državnih službenika i namještenika u skladu sa zakonom,
16. brine se o zakonitom i pravodobnom obavljanju poslova iz nadležnosti Gradskih službi i poduzima mjere za osiguravanje njihovog efikasnijeg rada,
17. sklapa ugovore i druge pravne poslove u skladu sa zakonom, Statutom i odlukama Gradskog vijeća,
18. brine se o urednom i pravilnom korištenju imovine i sredstava grada,
19. obavlja i druge poslove utvrđene Zakonom, drugim propisima i Statutom Grada.

## **IV PRAVNO SLJEDNIŠTVO**

### **Član 13.**

- (1) Grad Visoko je pravni sljednik Općine Visoko i ima Ustavom i Zakonom određene nadležnosti Grada.
- (2) Grad Visoko preuzima nadležnost, prava, obaveze i imovinu Općine Visoko.
- (3) Vijećnici u Vijeću Općine Visoko i Načelnik Općine Visoko, izabrani su na Općinskim izborima održanim 02.oktobra 2016.godine, nastavljaju sa radom kao vijećnici u Gradskom vijeću i Gradonačelnik Visokog.
- (4) Općinske službe za upravu, stručne i druge službe, tijela uprave i institucije nastavljaju sa radom kao službe, tijela i institucije Grada Visoko .
- (5) Javna preduzeća i javne ustanove, čiji je osnivač Općina Visoko nastavljaju sa radom kao javna preduzeća i ustanove Grada Visoko.

## V PRELAZNE I ZAVRŠNE ODREDBE

### **Član 14.**

(važenje propisa)

Odredbe Statuta Općine Visoko («Službenom glasniku općine Visoko» broj: 01/11, 08/13 i 11/18) i ostali općinski propisi ostaju na snazi ukoliko nisu u suprotnosti sa ovom Statutarnom odlukom.

### **Član 15.**

(stupanje na snagu)

Ova Statutarna odluka stupa na snagu danom objavljivanja u «Službenom glasniku Općine Visoko».

Broj: 01/1-155/19  
31.05.2019. godine  
V i s o k o

**PREDSJEDAVAJUĆI**  
Općinskog vijeća Visoko  
Bajro Fejzić, prof.